

ياللا ميلي ومرجحي  
يوم تواسي وتجرحي  
ولما يوم راح تفرحي  
إياك تنسي تفرحينا

.....

### أنا الناسك

أنا الناسك ف ملكوتك  
وأنا وناسك الفضى  
أنام و أتحنى ب سكونك  
وأقوم بجمالك أتوضا  
  
أنا العاشق ف ليل نيلك  
أنا حلك وترحالك  
لا يوم كليت عشان باصبر  
ولا يوم هزنتي أحوالك

نغيب عنك لكن بنعود  
وأشوف ف جمالك الجنه  
و من غيرك غريب مفقود  
وطينة أرضك الحنة

فلما باشوف غلط فيك  
باحاول أقول عشان حُبك  
أنا ابنك هاداويكي  
فأكيد جانبك ومش ضدك

يا حلم اتفصل ومش قدي  
وأنا قدي أكون قدك  
ماهو نفس الطينة دي نبضي  
و اصل النبض من أرضك

فيبقى لا عمري هأديكي  
ولا حتى بافكر أتسلى  
وهتفضل إيدي ف اديكي  
ولا عمري يا بلدي هتخلى

.....

## بيكيا

معايا أخلاق  
ومنسيه  
معايا ساعات  
رومانسيه  
وصوت الست  
ف الراديو  
و صورة ناس  
وضحكايا  
وألف حكايه  
وحكايه